

01/01/1997

Pembelajaran sumber teknologi penting

KUALA LUMPUR, Selasa - Kesungguhan Malaysia mempelajari teknologi dari pelbagai negara sama ada di Timur atau Barat amat penting dalam pembentukan sebuah negara maju dalam abad akan datang.

Demikian pandangan beberapa tokoh industri dan ekonomi terhadap kenyataan Perdana Menteri semalam berhubung usaha kerajaan mencari sumber teknologi baru bagi memajukan industri di negara ini.

Tokoh akademik, Prof Diraja Ungku Aziz, berkata soal di mana sumber teknologi yang dipelajari tidak timbul kerana sifat teknologi adalah sejagat.

"Dunia sekarang tidak bersempadan menyebabkan sesuatu teknologi yang dibangunkan relevan untuk seluruh dunia.

"Sesuatu teknologi yang baik tidak diukur daripada persempadanan geografi," katanya ketika dihubungi, di sini, hari ini.

Dalam sidang akhbar selepas melancarkan kereta Proton kesejuta di Shah Alam semalam, Datuk Seri Dr Mahathir Mohamad, menegaskan wujudnya salah faham ketika kerajaan mengumumkan Dasar Pandang Ke Timur.

Ungku Aziz berkata, walaupun teknologi yang diperolehi dari Jepun adalah baik, adalah penting bagi negara menguasai sumber teknologi lain.

Matlamatnya, kata beliau, bagi membolehkan rakyat Malaysia membangunkan teknologi kita sendiri untuk kegunaan negara pada masa depan.

(END)